

Na osnovu člana 14. stav 3. Zakona o sistemu indirektnog oporezivanja u Bosni i Hercegovini ("Sl. glasnik BiH", broj 44/03), Upravni odbor Uprave za indirektno oporezivanje BiH, d o n o s i

P R A V I L N I K

O CARINSKIM OBILJEŽJIMA

Član 1.

Ovim pravilnikom propisuje se vrsta, izgled i način upotrebe carinskih obilježja.

Član 2.

Carinska roba obilježava se carinskim obilježjima radi onemogućavanja neovlaštenog korišćenja i obezbjeđenja njene istovjetnosti od trenutka stavljanja pod carinski nadzor do završetka zahtijevanog carinski odobrenog postupanja ili upotrebe.

Član 3.

Roba se obilježava carinskim obilježjima ako je to predviđeno Zakonom o carinskoj politici BiH ili drugim propisima donesenim na osnovu tog zakona, odnosno ako u carinskom postupku treba obezbijediti istovjetnost robe.

Član 4.

Carinska obilježja su carinska plomba, te otisci carinskog pečata i štambilja.

Kao carinska obilježja smatraju se i opis robe, fotografije, skice ili crteži sa opisom robe, ovjereni od carinskog organa, koji se upotrebljavaju ako se na carinsku robu ne mogu staviti carinska obilježja iz stava 1. ovog člana.

Član 5.

Carinska plomba može biti metalna ili plastična.

Metalna carinska plomba je plosnati komad olova, oblika poluelipsaste pločice, veličine 27 x 17 mm, sa nazubljenim produžetkom u gornjem dijelu pločice, dužine oko 17 mm.

Pri obilježavanju robe, na nazubljeni dio plombe se postavlja kanap, željezna žica ili sl., a zatim se plomba žigoše (presuje) carinskim kliještima, na kojima je na jednoj strani urezan grb Bosne i Hercegovine, a na drugoj strani broj kliješta.

Svaka carinska kliješta moraju imati poseban broj.

Plastična carinska plomba je izrađena od tankog plosnatog komada plastike, u drugom dijelu nazubljena, a u prvom sa formiranim otvorom za provlačenje i zatezanje nazubljenog dijela.

Plastična carinska plomba na sebi ima serijski broj kao identifikacijsku oznaku.

Član 6.

Carinske plombe se izrađuju za jednokratnu upotrebu i moraju imati karakteristike i ispunjavati tehničke uslove navedene u Prilogu 32. Odluke o provedbenim propisima Zakona o carinskoj politici BiH ("Sl. glasnik BiH", broj 63a/04).

Član 7.

Carinski štambilj četverougaoanog je oblika dimenzije 55 x 25 mm, s ugrađenim pečatom prečnika 20 mm, a sadrži:

- na lijevoj strani pečat s državnim grbom Bosne i Hercegovne, desno od grba je broj pečata, te na obrubu natpis Bosna i Hercegovina,
- na desnoj strani: naziv regionalnog centra gore, naziv carinske ispostave/ carinskog referata dole, zatim uz desni rub okomito šifru štambilja, te
- datumar u sredini desnog dijela štambilja.

Član 8.

Carinski pečat je okruglog oblika, prečnika 50 mm i na njemu je upisan pun naziv carinskog organa u koncentričnim krugovima oko grba Bosne i Hercegovine, izrađen u skladu sa propisima o pečatima institucija BiH.

Član 9.

Carinska obilježja stavljaju se, odnosno utiskuju na najpodesnije mjesto na robu, na omotu robe, na prevoznom sredstvu, prostoriji ili prostoru, tako da se nikakva roba ne može vaditi ili stavljati unutra bez ostavljanja vidljivih tragova oštećenja carinskih obilježja.

Broj i oznaka stavljenih carinskih obilježja, na propisan način, unosi se u odgovarajuću ispravu (carinsku prijavu, prevoznu ispravu, zapisnik i dr.).

Pri stavljanju carinskih obilježja roba ne smije da se ošteti ili učini neupotrebljivom za svrhe koje su predviđene carinskim postupkom u koji se stavlja.

Član 10.

Carinska obilježja, carinska kliješta i drugi materijal potreban za obilježavanje robe, obezbjeđuje Uprava za indirektno oporezivanje.

Član 11.

Ovaj pravilnik stupa na snagu osmog dana od dana donošenja od strane Upravnog odbora Uprave za indirektno oporezivanje i objaviće se u "Službenom glasniku Bosne i Hercegovine".

Broj: _____/05

Datum, _____ 2005. godine

Predsjednik
Upravnog obora
Joly Dixon

O b r a z l o ž e n j e

uz prijedlog Pravilnika o carinskim obilježjima

Pravna osnova za donošenje predloženog Pravilnika o carinskim obilježjima od strane Upravnog odbora UIO se može naći u odredbi člana 14. stav 3. Zakona o sistemu indirektnog oporezivanja u Bosni i Hercegovini, jer se radi o propisu čijim će se donošenjem, u carinskom postupku, obezbijediti primjena i poštovanje odredaba Zakona o carinskoj politici BiH i njegovih provedbenih propisa koje se odnose na pitanja koja se njime regulišu.

Pitanje vrste, izgleda i upotrebe carinskih obilježja, koja se, kao mjera carinskog nazora, koriste za obilježavanje carinske robe radi onemogućavanja neovlaštenog korišćenja i obezbjeđenja njene istovjetnosti od trenutka stavljanja pod carinski nadzor do završetka zahtijevanog carinskog postupka, ranije je bilo regulisano propisima bivših Carinskih uprava u BiH.

Međutim, uspotavljanjem Uprave za indirektno oporezivanje, koja je jedini organ u BiH nadležan za sprovođenje zakonskih propisa o indirektnom oporezivanju, to je potrebno da, u cilju obezbjeđenja uslova provođenja mjera carinskog nadzora propisanih Zakonom o carinskoj politici i njegovim provedbenim propisima, ovo pitanje bude na jedinstven način regulisano od strane ove Uprave. Osim toga, donošenje predmetnog pravilnika je neophodno i radi nabavke carinskih obilježja, prevashodno carinskih plombi, koje se svakodnevno koriste u radu carinskih organa.

Banja Luka, 07.02.2005. godine

SEKTOR ZA CARINE UIO